

'Un den forma chikito, otro grandi'

SAC y SMAC a habri temporada di Carnaval

ORANJESTAD — Ambos fundacion SAC y SMAC a tene nan apertura oficial di temporada di Carnaval 61 ayera. SAC a tene esun di dje na su cede na Dakota, mientras cu SMAC a tene un evento anochi na Carnival Village.

Mainta 11:11 presente na e sede di Stichting Arubaanse Carnaval (SAC) na Dakota, presidente di SAC, Tecla Kelly a hiba palabra, sigui pa un brindis. Na e ocasion SAC a celebra e apertura di Aruba su Carnaval 61. E luga scogi pa e apertura ta un luga cu hopi recuerdo di e trabounan intensivo cu a wordo haci pa Aruba su Carnaval.

"Temporada di Carnaval a cuminsa, ban ta prepara pa un carnaval yen ambiente, fantasia, alegria cu actividad local lo resalta y luci riba camindanan di Aruba. SAC ta desea tur lider di grupo, participantenan, musiconan y boluntarianan un dushi carnaval 61. E slogan ta bisa: 61 mes t'esun, den tur skina Aruba lo keda bria cu tur color y fantasia. Mi carnaval ta keda number 1."

Ignorancia

E apertura a bay hunto cu tumberito, reina, prins y pancho, uzando e martiu di presidente di SAC a declara Carnaval 61 oficialmente habri. SAC a bisa cu e no ta divulga e jingle y tampoco e programa di Carnaval na e apertura. SAC ta warda pa despues di 19 di november, pa mira kico ta pasa despues cu e caso contra gobierno tuma luga. SAC ta contento cu gobierno awo ta wak con importante Carnaval ta y cu ta duna esaki sosten, pero no ta di acuerdo cu mester kita Carnaval for di un fundacion, basa riba mentira, sra. Kelly a opina. "Palabranan menos bunita y storianan infunda a wordo uza, esaki pa motibo di ignorancia y falta di conocimiento, cual ta causa rabia y odio sin tin mester", sra. Kelly a bisa.

SAC su existencia

SAC ta un fundacion cu lo keda existi, pa keda traha y mantene e fundacion, sra. Kelly a duna di conoce. SAC for di comienzo a para pa e organizacion como esaki ta uno no gubernamental, pues independiente. "SAC semper ta dispuesto pa traha pero



amor mester bin di tur dos banda." Sra. Kelly a bisa cu e ta spera cu pa otro siman lo tin claridad riba e situacion, pero ta bisa e gruponan cu ta cla pa participa na Carnaval 61 pa dal bay y haci esaki.

Sponsornan

Tin rumornan fuerte cu un di e sponsornan grandi di carnaval, Setar, lo a hala atras di SAC. Balashi lo a hala atras aña pasa caba. Bon Dia Aruba a puntra Sra. Kelly si esaki ta cuadra cu berdad. Segun presidente di SAC no, pero el a bisa si cu tin sponsornan cu ta teniendo nan sosten on hold en espera di e caso contra gobierno.

Jingle

RBC ta un di e promotornan grandi tras di e jingle oficial di Aruba su Carnaval. E aña aki e lansamento di e jingle ta tuma luga na RBC Sa-

saki hunto cu algun invitado Carnavalesco. Un representante di RBC a bisa Bon Dia cu e banco a opta pa ayera, no participa na henter e movimiento entre e dos organizacionnan cu lo tin permiso pa organisa Carnaval, y a scoge enbes pa haci esaki apart. E representante a bisa cu esaki no ta cambia nada. "E jingle ta pa Aruba uza."

Apertura SMAC

Mainta esunnan den sintonia di diferente stacion di radio manera Power FM, Blue FM y Caliente FM, por a scucha canticanan di Carnaval, den espera di representantenan di SMAC pa anuncia apertura di Aruba su Carnaval. Presidente di SMAC Randolph Thiel, Miembro di Gruponan Uni Lienchie Merryweather y Chibi van der Hans encarga cu e revista Bacchanal tabata presente na Power FM, 11:11:11 pa haci

esaki. Sr. Thiel a yama tur organisacionnan y comunidad, pa celebra e ocasion aki na Carnival Village.

A scoge pa haci un festival den Carnival Village na San Nicolas como cu Carnavaliستا tin varios aña ta boga pa un cas di Carnaval, sr. Thiel a bisa. Aworaki cu Aruba ti esaki, pakico no haci uzo di dje, el a bisa. A puntra sr. Thiel si mas actividad ta bay wordo organisa den Carnival Village mirando cu aña pasa por ehempel, solamente Caiso y Soca Monarch a wordo organisa eyan. Sr. Thiel a bisa cu e programa y unda esakinan ta wordo organisa pa Carnaval 61 a wordo dividi na diferente luga pa motibo di tempo. "Riba e schedule lo por mira e cambionan"

Sr. Thiel a bisa cu el a traha hopi di cerca cu diferente grupo, pues traha cu Gruponan Uni ta algo cu ta bay hopi facil. SMAC ta habri pa compronde e musiconan tambe. "Nan ta Carnaval, pues mi lo haci miho cu por na bienestar di Carnaval." Lienchie Merryweather di grupo Champagne ta contento cu e periodo di Carnaval cu a cuminsa cual ta lanta un animo cerca hopi. Diasabra a cuminsa cu preparacionnan pa Carnaval y a logra finalisa paña di Carnaval pa e 'chikitinnan' den tres dia.

Continúa riba Pagina 11



Continuacion di Pagina 2

Fiesta na Carnival Village
Anochi hopi hende a acudi na e fiesta di apertura den Carnival Village na San Nicolas. A rindi homenahe na tres figura importante den Carnaval, esta Claudius Philips, Roberto 'Boedoem' Brown y grupo Los Laga Bay. Sinembargo no a presenta ningun programa ainda. Segun presidente di SMAC Randy Thiel un draft lo bay wordo presenta awe den medionan di comunicacion. Hecho ta cu no tur grupo a acorda riba e programa. Sr.Thiel a bisa cu e ta sumamente contento cu e exito di e evento di apertura y cu SMAC ta cla pa asumi e reto di organisa Carnaval 61.

Ta warda e caso bin dilanti y ta sigui haci preparacionnan. Con cu hues dicidi den e caso cu SAC a lanta contra gobierno, sr. Thiel ta bisa cu lo bay respecta e decision.

Buki Bacchanal

E persona encarga cu e revisita Bacchanal, Chibi van der Hans a bisa cu e revista pa Carnaval 61 ta practicamente cla. Aworaki ta wardando pa e schedule di Carnaval di SMAC pa por finalisa e revista. El a bisa tambe cu e ta wardando e schedule di SMAC mirando e ultimo desaroyonan cu a tuma luga, unda cu prome minister a duna SMAC e permiso pa organisa Carnaval 61. El a agrega bisando si esaki no tabata

e caso, e schedule di SAC lo wordo uza.

Medionan social

Medionan social tambe ta yena cu comentario di carnavalistanan, Bon Dia Aruba por a mira riba personanan cu ta cuestiona e posibilidad pa Carnaval wordo organisa pa tur dos organisacion y tambe algun cu no ta worry ken organisa e Carnaval, tanten cu tin Carnaval. Riba e pagina di Facebook di SAC, por a mira palabranan di Bon Bini y Pabien na SAC cu apertura di Carnaval 61. Otro comentario cu a lanta reaccion di varios, ta un publicacion cu ta cuestiona e uzo di Carnaval 61 pa SMAC mirando cu ta nan prome aña. Personanan a comenta cu SMAC no tin



derecho pa haci uzo di e '61' y lo mester uza '1'. Reaccion cu e comentarionan/opinionnan aki a haya ta cu Carnaval

ta di Aruba y no ta pertenece na ningun organisacion, pues ta celebracion di Aruba su Carnaval 61. □